

## Nono...

Nono, gib mer de hònt,  
kontar mer eppes van inger lònt.

Sog mer nou a vòrt abia as gami't ist de bèlt,  
kontar mer bider van kriag, van vorcht ont va der kelt.  
Sog mer nou abia vroa as de gaben pist, benn as de pist um keart,  
ont hòst pfuntn de dai'na lait za bòrtn der um en heart.

Kontar mer nou de mia'n as de gatu'n hòst za paun dòs haus,  
ont va benn as de gaòrbetn hòst en de gruab, anin ont anaus.  
Kontar mer van heib ont van groa'met as de hòst as n puckl trong,  
van òlls sèll as de hòst ver ins gatu'n, a'ne as der biar hom gamiast vrong.

Sog mer nou a vòrt abia vroa as de gaben pist  
benn as de "tata" kemmen pist.  
Ont bos as de probiart hòst benn as i augòngen pin,  
benn as de tsechen hòst s kin van dai' kin.

Nono, kontar mer abia as ist  
benn as de kròft nea'mer ist.  
Sog mer, za kemmen òlt, abia is,  
benn as de hearst as de nicht mear bèrt pist?

Iaz so i der eppes, nono, gor men s de schbòch ont òlt pist,  
ver de gònz familia nou runt bichte du pist!  
Klòff mer òlbe nono, pamia de nia,  
van dai'na beirter ganua hòn i nia!

Nono, gib mer de hònt, mòch ber a ker be zòmmen.  
I bar nia vergèssn de dai' hònt as de mai'na bòngen.  
Sèll as du hòst mer gem,  
ist pet miar ver en gònz mai' lem!

## Nu'na

Nu'na, hòlt me ka diar, nimm me as de schoas,  
i bellt nia kemmen groas.

De dai' tir ist òlbe offet, s dai' haus òlbe bòrm,  
abia schea' benn as de hòlts me as de schoas!

Gib mer de hònt nu'na ont aloa' lò me lai' nia,  
klòff mer nou, de dai'na beirter vergèsse i nia.

En dai' bòrm haisl abia a liachtl pist du,  
binter ont summer s vaier òlbe u'.

I tua au de dai' tir un du pist òlbe semm,  
ont òll vort a guats bourt hòst mer gem.

Nu'na, as de òlbe ver mi bail hòst,  
gib mer de hònt ont plaib pet miar finz as de kònnst!

Sog mer nu'na de beiln mia'n as hom en dai' puckl krump gamòcht,  
de vitzn as n dai' tschicht, song mer as de hòst vil kummer gahòt.

Kontar mer s dai' lem, darmit as i schell verstea'  
en loat as ist en de seng zachen as ka bòngen oar gea'.

Sog mer gor van seng vòrt as de hòst tònzt ont galòcht  
ont van òlla de kinder as de hòst en òrm gahòt.

Kontar mer van òlla de lait as de hòst pakemmp en lem  
en òlla du hòst gahòt eppes za gem!

Do tsetzt as de dai' schoas, sich i s dai' bais hor unter en tiachl aus,  
va diar hònt i galeart as lem ver sei sèlber zolt se nèt aus.

De mai' hònt en de dai', an puss as n hirn, nu'na hilf mer za kemmen groas!

En mai' lem bar i òlbe hom a platzl ver di, ont dòs ist òlls sèll as i boas!

Nu'na, abia bòrm as s sai' de dai'na òrm,  
de daina ang va hundert vòrm.

De vòrm va bem as gearn hòt  
ont arschleng lai an schean gadenk lòt.